

Alþingi
Erindi nr. P 140/1615
komudagur 22.3.2012



HVÍTASUNNUKIRKJAN
FÍLADELFÍA

Nefndasvið Alþingis

Austurstræti 8-10

150 Reykjavík

Reykjavík, 22. mars 2012.

Til allsherjar- og menntanefndar Alþingis

Umsögn um frumvarp til laga um breytingar á lögum um skráð trúfélög, mál 509, þingskjal 771.

Með bréfi dags. 7. mars 2012 var Hvítasunnukirkjan Filadelfía beðin að veita umsögn um ofangreint frumvarp sem nú liggur fyrir á Alþingi. Stjórn kirkjunnar hvetur allsherjar- og menntanefnd þingsins til að skoða vel eftirfarandi athugasemdir með það að markmiði að sem víðtækust sátt náist um frumvarpið, en að óbreyttu kann frumvarpið ef það verður að lögum að missa marks og skapa togstreitu og óvissu í samfélaginu.

Lækkun sóknargjalda

Í fylgiskjali með frumvarpinu frá fjármálaráðuneytinu segir að fjárhagsstefna ríkisins í opinberum útgjöldum kalli á að fjölgun lífsskoðunarfélaga verði mætt með lækkun á sóknargjöldum. Sú ráðstöfun kann að bitna verulega á öllum þeim sem nú þegar þiggja sóknargjöld og grefur undan núverandi starfsemi þeirra. Þá er vert að íhuga að hvaða leiti skerðing slíkra sóknargjalda þjóni hagsmunum samfélagsins í heild, en í því ástandi sem nú ríkir í þjóðfélaginu hafa trúfélög staðið mikilvæga vakt og þjónað samfélagi sínu, þá sérstaklega þeim sem minna mega sín. Frekari skerðing sóknargjalda, byggð á óljósum hugmyndum um fjölda félaga sem verða stofnuð og umsóknum um skráningu í slík félög er óásættanleg. Ekkert starfandi trúfélag getur gert marktæka fjárhagsáætlun gangi þetta eftir. Það getur varla verið áætlun Alþingis að gera út af við starfandi trúfélög með þessum hætti á tímum sem nú.

Um hugtakanotkun

Hugtakanotkun í frumvarpinu er á stöku stað afar gildishlaðin og óviðeigandi gagnvart trúfélögum sem og öðrum félögum sem eru andlag frumvarpsins. Í 4. gr. frumvarpsins er t.a.m. lögð til breyting á 2. mgr. 3. gr. þar er það gert að skilyrði að félag viðhafi tiltekna athafnir sem nánari dæmi eru gefin í lögnum. M.a. er þar vísað til „fermingar“. Þrátt fyrir að ákvæðið tiltaki athafnirnar sem dæmi er orðalagið ekki viðeigandi þar sem fermingin snýr að „staðfestingu skírnar“ og er þess vegna hugtak og athöfn sem bundin er við trúfélög sem viðhafa barnaskírnr. Ýmis kristin trúfélög bjóða ekki upp á fermingu, þess í stað er boðið upp á unglingsblesun eða þessháttar athöfn. Eðlilegt væri að gæta jafnræðis í texta m.t.t. annarra kristinna trúfélaga og/eða félaga er lögnum er ætlað að fjalla um.

Hvítasunnukirkjan Filadelfía
Hátúni 2
105 Reykjavík
Sími: 53 54 700
Fax: 53 54 710
www.filadelfia.is



HVÍTASUNNUKIRKJAN
FÍLADELFIÁ

Skráning barna í trúfélög

Í 9. gr. frumvarpsins kemur fram að ef foreldrar koma sér ekki saman um hvaða trúfélagi barn þeirra skuli tilheyra verði staða þess ótilgreind. Erfitt er að sjá annað en að þá sé barnið í reynd skráð utan trúfélaga. Slík niðurstaða hlýtur að vera ófullnægjandi í tilviki þar sem barn á eitt foreldri sem stendur utan trúfélags og hitt foreldrið sem sé hluti af trúfélagi. Í þeim tilvikum getur það foreldrið sem stendur utan trúfélags á óbeinan hátt þröngvað afstöðu sinni á barn sitt í óþökk hins foreldrisins. Nauðsynlegt er að koma í veg fyrir slíka ósanngjarna stöðu með því annað hvort að skilgreina hina „ótilgreindu“ stöðu barnsins á ásættanlegan hátt eða þá, sem er um margt eðlilegri niðurstaða, að nota sömu leið og farin hefur verið í t.d. lögum um mannanöfn nr. 45/1996. Í þeim lögum fá foreldrar 6 mánuði til að gefa barni sínu nafn, að þeim tíma liðnum er heimilt að beita foreldra dagssektum uns nafngjöf hefur verið fullnægt. Í frumvarpi þar sem verið er að jafna stöðu trúfélaga og lífsskoðunarfélaga verður ekki annað séð en þetta ákvæði vinni markvisst að því að koma börnum úr trúfélögum. Í öllum tilvikum er ótækt barnsins og foreldranna vegna að búa við einhvers konar „ótilgreinda“ aðstöðu til lengri tíma.

Fjölgun leyfa

Í 8. gr. frumvarpsins er fjallað um að þeir sem í dag annast embættisverk skráðs trúfélags geti falið einhverjum sem þeir treysta og uppfylla ákveðin skilyrði að annast tiltekin verk, innan félagsins. Rökin eru þau að forstöðumaður geti haft mikið að gera, veikst eða forfallast og þá sé nauðsynlegt að fleiri hafi leyfi. Fyrst trúfélög hafa getað haft leyfið á einni hendi og sinnt skyldum sínum hvers vegna er þá verið að fjölga leyfum til embættisverka? Ef félög þurfa aðeins að bjóða upp á tvær félagslegar athafnir til að öðlast skráningu þá hlýtur ein manneskja að geta sinnt því hlutverki. Í besta falli þyrfti að gera kröfu um ákveðinn fjölda félagsmanna áður en leyfum væri fjölgað. Telja má eðlilegt að fjöldi félagsmanna sé að lágmarki 50 manns fyrir fyrsta leyfi.

Stjórn Hvítasunnukirkjunnar Filadelfíu ítrekar ósk sína um að frumvarpið verði unnið betur.

Virðingarfyllst,

Vörður Leví Traustason

Prestur Hvítasunnukirkjunnar Filadelfíu í Reykjavík